



## Tamanut ammasumik siunersiuinerit

Inatsisartut Suleriaasianni § 19, imm. 4 naapertorlugu siunersiuinissanut imaluunniit tamanut ammasunut aggersaasoqarsinnaavoq. Tamanut ammasumik siunersiuinerimut aggersaasoqarpat ataatsimiinnermi kikkulluunniit najuussinnaapput.

### Siunersiuineq suua?

Ataatsimiititaliap pissutsit eqqumaffigilikkani naam-maginnngisaniluunniit nassuiaateqarfigineqarnissai kissaatigigunigit Naalakkersuisunut ilaasortamik siunersiuinissamut qanoq ilisukkulluunniit aggersaasinnaavoq. Aammalu assersuutigalugu inatsisissatut siunnersuummut saqqummiunneqartumut paasissutissanik pissarsiniarluni siunersiuinissamut aggersaasoqarsinnaavoq. Kiisalu ataatsimiititaliap pineqartup Naalakkersuisunullu ilaasortap sulias-saqarfiisa iluanni nalinginnaasunut imaluunniit aalajangersimasunut tunngatillugu naalakkersuinikkut oqallisiginninnertut siunersiuinerit ingerlanneqarsinnaapput.

Siunersiuinerit taamaattut aqutugalugit Naalakkersuisoqarfimmi isumaliutigineqartut pillugit ataatsimiititaliaq malinnaasinnaavoq (immaqalu sunniuteqarfiginnissinnaalluni). Ataatsimiititaliap nammineq aalajangiinera malillugu siunersiuineq tamanut ammasutut matoqqasutulluunniit ingerlanneqarsinnaavoq. Tamanut ammasumik siunersiuinerimmi kikkulluunniit najuussinnaapput. Akerlianilli matoqqasumik siunersiuinerit tamanit najuuffigineqarsinnaanngillat.

### Siunersiuineq tamanut ammasuugaangat

Ataatsimiititaliaq tamanut ammasumik siunersiuinerimut aggeqqusissalluni aalajangerpat, tamanna Inatsisartut nittartagaanni "Nutaarsiassat" ataanni allagarsinneqassaaq. Tassani aamma ilaassapput siunersiuinerimut qulequtaritinnegartoq siunersiuinissamullu apeqqutit.

Tamanut ammasumik siunersuisoqartillugu kikkulluunniit siunersiuinerimut malinnaanissamut periarfissaqarput. Inatsisartunili inissakilliorneq pisutugalugu siunersiuinerimut inuit amerlanerpaamik 15-it najuussinnaapput. Tamatuma saniatigut inissat tallimat tusagassiortunut immikkut atugassiissutigineqarput. Inissat Inatsisartut Allattoqarfiannut inatsisartut@inatsisartut.gl-imut imaluunniit 34 50 00-imut saaffiginnikkut inniminnerneqarsinnaapput, tamatumani siulliullutik saaffiginnittut inissanik pissarsisinnaallutik.

Siunersiuinerimut najuussinnaassagaanni inissamik inniminneereernissaq pisariaqarpoq. Tusarnaariartut siunersiuinissaq kingusinnerpaamik minutsinik 15-inik sioqqullugu Inatsisartut saaffiginnittarfiannut apuutereersimassapput. Tassani allagartat saqqarmiut Inatsisartuniinnerup nalaani ersarissunngorlugit atorneqartussat tunniunneqassapput.

Siunersiuineq kalaallisut danskisullu malinnaaffigineqarsinnaassaaq.

### Malittarisassat

Siunersiuinissamut tusarnaariat inissamik neqeroorfigineqarsimasut malittarisassat uku malissavaat:

- Siunersiuinissamut tusarnaariat ersittumik saqqarmioqassapput. Inatsisartut Allattoqarfiat inissamik innersuussisimappat tusarnaarianut saqqarmioq saaffiginnittarfimmit tunniunneqassaaq.
- Tusarnaariat siunersiuinerup nalaani nipaarsaasapput.
- Siunersiuinerimmi nipimik assinillu immiussisoqarsinnaavoq, tamanna siunersiuinerimmi peqataasunut akornutaanngippat.
- Oqarasuaatit angallattakkat nipaarutsinneqassapput.
- Tusarnaarianut tusagassiortunullu sassaalliisoqassanngilaq.
- Siunersiuinerup kingorna naalakkersuinermik sulialinnik apersuineq inimi tusagassiortunut atugassiissutaasumi ingerlanneqassaaq.
- Siunersiuinerup kingorna innuttaasut tusagassiortunullu inimi tusagassiortunut atugassiissutaasumi naalakkersuinikkut suliaqartunik apersuinngitsut sullissinnermut immikkoortortamit saaffiginnittarfimmukaanneqassapput.
- Ataatsimiinnermi peqataasut akornusersorneqqunagit siunersiuinerup aallartereernerani innuttaasut siunersiuinerimut isersinnaanngillat.
- Tusarnaariat siunersiuinerimik kalaallisut danskisullu malinnaasinnaanngorlugit atortulersuutinik atugassinneqassapput. Teknikikkut atortulersuutit pisariaqarneratut qajassuunneqassapput.